



Ni Presidente Dieter F. Uchtdorf
Maikadua a Mammagbaga iti Umuna a Panguluén

Ti Naan-anay nga Ayat ti Mangpaksiat iti Butengtayo

Iwaksitayo koma dagiti butengtayo ket agbiagtayo nga addaan rag-o, pakumbaba, ken natured a panagtalek nga adda kadatayo ti Apo.

Patpatgek a kakabsatko, ay-ayatek a gagayyem, anian a pribilehio ken rag-o ti panaguummong kas sangalubongan a Simbaan a nagkaykaysa iti pammatitayo ken ayat para iti Dios ken kadagiti annakna.

Naipangpangruna nga agyamanak iti kaadda ti patpatgentayo a propeta, ni Thomas S. Monson. President, kanayonto nga ipapusomi dagiti balikasmo maipapan ti panangiturog, balakad, ken pagsiriban. Ay-ayatendaka, President Monson, ket kanayon nga ikarkaragandaka.

Kadagiti napalabas a tawen, idi agserserbiak a stake president iti Frankfurt, Germany, inasitgannak ti maysa a maipatpatgeg ngem naliday a kabsat a babai iti gibus ti maysa kadagiti mitingmi iti stake.

“Saan kadi a makapadismaya?” kinunana. “Mabalin nga adda uppat wenno lima a tattao ti matmaturag kabayatan ti panagsaritami!”

Nagpanunotak iti apagkanito ket insungbatko, “Masiguradok a ti panagturog iti Simbaan ti makapasalun-at a turog iti amin a pannaturag.”

Nangngeg ti ay-ayatek nga asawak, ni Harriet, daytoy a panagsaritami ket kinunana a daytoy ti maysa kadagiti kapintasan a sungbat a naitedkon.

Ti Naindaklan a Pannakariing

Sumagmamano a ginagasut a tawen ti napalabas iti North America, maysa a tignay a maawagan iti “Great Awakening” [Dakkel a Pannakariing] a nagsaknap iti pagilian. Maysa kadagiti umuna a panggepna ket mangriing kadagiti tao a kasla matmaturag no maipapan kadagiti banag a naespirituan.

Naimpluensiaan ni ubing a Joseph Smith kadagiti banag a nanggeganna kadagiti agikaskasaba a paset daytoy a panagriing a mainaig iti relihion. Maysa kadagiti gapu no apay nga inkeddengna ti agkararag nga

agmaymaysa tapno sipapasnek a gunodenna ti pagayatan ti Apo.

Dagitoy nga agikaskasaba ket naindramaan, napnuan emosion ti estilo ti panagikasabada, a maamammo dagiti panangisuroda gapu iti nalaus a panangyunay-unayda kadagiti bumegbeggang nga impierno nga agur-uray iti managbasol.¹ Saan a nangpaturog kadagiti tao dagiti panagsaritami—ngem mabalin a nagtagtagainepanda iti dakes. Kasla pangbutbuteng kadagiti tao ti panggep ken wagasda a mangpilit kadagiti tao a kumappeng iti simbaan.

Pammutbuteng kas Panagmanipula

Idi pay laeng, a masansan a mausar ti pammutbuteng kas maysa nga tapno mapilit dagiti tao nga aggunay. Inusar daytoy dagiti nagannak kadagiti annakda, dagiti amo kadagiti empleadoda, ken dagiti politiko kadagiti botanteda.

Ammo dagiti eksperto iti marketing nga epektibo ti pammutbuteng ket masansan a mausar daytoy. Daytoy ti gapu no apay kasla isingsingasing ti sumagmamano nga advertisement a no ditayo gumatang iti breakfast cerealda wenno ti kabaruan a video game wenno cell phone, mabalin a nakaay-ay-ay ti panagbiagtayo, matay nga agmaymaysa ken naladingit.

Katawaantayo daytoy ket panunotentayo a ditayo mapapati iti kasta a panagmanipula, ngem no dadduma ar-aramidentayo. Pagdaksanna, no dadduma usarentayo dagiti isu met la a wagas tapno mapilit dagiti dadduma nga aramidenti ti kayattayo.

Adda dua a panggep ti mensahek ita: Ti umuna ket guyugoyennatayo a mangutob ken mangpanunot no

sadino ti pagpatinggaan ti panangusartayo iti pammutbuteng a mangguyugoy kadagiti dadduma—agraman dagiti bagbagitayo. Ti maikadua ket mangisingasing iti nasaysayaat a wagas.

Ti Dakes a Gapuanan ti Buteng

Umuna, pagsasaritaantayo ti dakes a gapuanan ti buteng. Asino kadi kadatayo ti saan pay pulos a napilit gapu iti buteng tapno mangan a nasayaat, agusar iti seat belt, agwatwat, agurnong iti kuarta, wenna agbabawi iti basol?

Pudno nga adda nabileg nga impluensia ti buteng kadagiti tignay ken ugalitayo. Ngem saan nga agpaut ken narabaw laeng dayta nga impluensia. Manmano nga adda bileg ti buteng a mangbalaliw kadagiti pusotayo, ken saan a pulos a mangbalaliw kadatayo nga agbalin a tattao a mangipateg no ania ti umno ken no asino ti agusto nga agtungpal iti Nailangitan nga Ama.

Mabalin a *sawen* ken aramiden dagiti tao a managbutbuteng dagiti umno a banag, ngem dida *marikna* dagiti umno a banag. Masansan a mariknada nga awan maaramidda ken agbababawi, ken makagurada. Iti agangay agbalin dagitoy a rikna iti panagduadua, pammasakit, ken panagalsa.

Daksanggasat a saan a limitado iti sekular a lubong daytoy saan a makaiturong a wagas iti panagbiag ken panangidaulo. Malidayanak a makadamag ti maipapan dagiti miembro ti Simbaan nga agaramid iti saan a nalinteg a panangituray—kadagiti man pagtaenganda, kadagiti awagda iti Simbaan, iti trabahoda, wenna iti inaldaw a pannakipulapolda kadagiti dadduma.

Masansan, a dillawen dagiti tao dagiti mangparparigat iti dadduma, ngem dida makita nga isuda mismo ti agararamid iti kastoy. Kayatda nga ipilit nga ipatungpal dagiti bukodda nga annuroten iti turay, ta no saan a suroten dagiti tao dagitoy nga annuroten, pagsawsaw-anda ida, pasakitanda iti nakemda, ken no dadduma dangranda no dadduma tibagida.

Kinuna ti Apo a “no datayo ket . . . mangtimbang wenna mangituray

wenna mangpilit kadagiti kararua dagiti annak ti tattao, iti ania man a kinadagsen ti kinikillo,, . . . adaywan ida ti langit {ken} maldaangan ti Espiritu ti Apo.”²

Mabalin nga adda dagiti kanito a masulisogtayo ketikalintegang dagiti tignaytayo babaen ti panamati nga ania man a tignay ket maawat no la ketdi ti panggepda ket manggun-od iti nasayaat a resulta. Mabalin nga ipagaruptayo a no pengdantayo dagiti dadduma, manipulaen, ken kapungtotayo ida ket pagsayaatandanto. Madi daytoy, gapu ta inlawlawag ti Apo a “ti bunga ti Espiritu ket ayat, rag-o, talna, naunday a panangitured, kinadungngo, kinaimbag, pammati, kinaemma, [ken] kinamanagteppel.”³

Maysa a Nasaysayaat a Wagas

Iti ad-adda pay a pannakaammok iti Nailangitan nga Amak, ad-adda met a makitak no kasano a paregtaen ken iturongna dagiti annakna. Saan a makagura, ken managibales.⁴ Ti mismo a panggepna—ti aramidna ken gloriana—ket tapno suruannatayo, itan-oknatayo, ken iturongnatayo iti kina-an-anayna.⁵

Inlawlawag ti Dios ti Bagina ken ni Moises kas “manangngaasi ken managparabur, nainnayad nga agpungtot, ken aglaplapanan iti kinaimbag ken kinapudno.”⁶

Ti ayat ti Amatayo iti Langit para kadatayo, nga annakna, ket nangnangruna pay ngem iti kabaelantayo a maawatan.⁷

Kayat kadi a sawen daytoy nga ilunod wenna baybay-an ti Dios dagiti ugali a maisuppiat kadagiti bilinna? Saan, saan iti kaano man!

Ngem kayatna nga ad-adda pay a balbaliwan saan laeng a dagiti ugalitayo. Kayatna a balbaliwan dagiti mismo a kinataotayo. Kayatna a balbaliwan dagiti puspusotayo.

Kayatna nga agkagumaantayo ken kumpettayo a naimbag iti landok a pagkaptan, sanguentayo ti buteng ken natured nga umaddang nga agpangsango ken agpangato nga agturong iti naillet ken akikid a dalan. Kayatna

daytoy para kadatayo gapu ta ayatennatayo ken gapu ta daytoy ti dalan nga agturong iti kinaragsak.

No kasta, kasano a guyugoyen ti Dios dagiti annakna a sumurot Kenkuana iti panawentayo?

Imbaon ti Dios ti Anakna!

Imbaon ti Dios ti Bugbugtong nga Anakna, ni Jesucristo, tapno ipakita kadatayo ti umno a wagas.

Paregtaennatayo ti Apo babaen ti panangguyugoy, naunday a panagitured, kinaanus ken kinaemma, ken ti di managinkukuna nga ayat.⁸ Adda ti Dios iti sibaytayo. Ay-ayatennatayo, ket no maitublaktayo, kayatna a bumangontayo, padasen manen, ket agbalin a natibtibker.

Isu ti mangisuro kadatayo.

Isu ti naindaklan ken napateg a namnamatayo.

Tarigagayanna a mangallukoy kadatayo iti pammati.

Agtalek kadatayo a makasursuro manipud kadagiti bidduttayo ken agaramid kadagiti umno a pili.

Daytoy ti nasaysayaat a wagas!⁹

Ania dagiti Dakes ti Lubong?

Maysa kadagiti wagas a kayat ni Satanas a pangmanipulatayo kadagiti dadduma ket ti panangitalimudok ken panangpasaknap iti kinadakes iti lubong.

Awanen ti panagduadua a kanyonen a saan a perpekto ti lubong, idi pay laeng, ken ita, ken agtultuloyto latta. Adu dagiti inosente a tao a nagsagaba gapu kadagiti pasamak ti nakaparsuaan kasta met iti panangranggas ti tao. Ti kinadangkens ken kinatiri iti panawentayo ket naidaddaduma ken nakaam-amak.

Ngem iti baet ti amin kadagitoy, diak isukat ti panagbiagko iti daytoy a panawen iti ania man a sabali pay a panawen iti pakasaritaan ti lubong. Naparaburantayo iti nakalablalon tapno agbiagtayo iti maysa a panawen nga adda saan a mapantayan a panagdur-as, pannakalawlawag, ken pagimbagan. Kangrunaan iti amin, naparaburantayo iti kaadda ti pakabulkan ti ebanghelio ni Jesucristo, a

mangted kadatayo iti naidumduma a pannirigan kadagiti pagpeggadan ti lubong ken mangipakita kadatayo no kasano a liklikantayo dagitoy a pagpeggadan wenno sanguentayo dagitoy.

No panunotek dagitoy a parabur, kayatko ti agparintumeng ket iruknoy ti panagdayaw iti Nailangitan nga Amatayo para iti saan nga aggibus nga ayatna para iti amin kadagiti annakna.

Diak mamati a kayat ti Dios nga agbalin a managbutbuteng dagiti annakna wenno makiramanda kadagiti kinadakes ti lubong. “Ta saannatay nga inikkan ti Dios ti espiritu ti kinatakrot; no di ti kinatibker, ken ti ayat ken ti naimbag a nakem.”¹⁰

Inikkannatayo iti adu a rason tapno agragsak. Nasken laeng a sapulen ken bigbigentayo dagitoy. Masansan nga ipalagip kadatayo ti Dios a “dikay agbuteng,” ken “agragsakkayo,”¹¹ ken “dikay agbuteng, bassit nga arban.”¹²

Makirangetto ti Apo kadagiti Dangadangtayo

Kakabsat, datayo dagiti “bassit nga arban” ti Apo. Datayo dagiti Santo iti ud-udina nga aldaw. Naikasigudan iti nagantayo ti panagkumittayo nga agur-uray iti panagsubli ti Mangisalakan ket isaganatayo ti bagbagitayo ken ti lubong iti panangawat Kenkuana. Ngarud, agserbitayo koma iti Dios ket ayatentayo dagiti padatayo a tao. Aramidentayo koma daytoy nga addaan gagangay a panagtalek, addaan pakumbaba, a saan nga uy-uyawen iti kaano man ti ania man a sabali a relihion wenno grupo dagiti tattao. Kakabsat, nabilintayo nga agadal iti balikas ti Dios ken dumngeng iti timek ti Espiritu, tapno mabalintayo a “maamuan dagiti tanda ti panawen, ken dagiti tanda ti yaay ti Anak ti Tao.”¹³

Ngarud, saantayo nga ignorante kadagiti pannubok ti lubong, wenno ditayo ammo dagiti rigat ti panawentayo. Ngem saan a kayat a sawen daytoy a nasken parigatentayo ti bagbagitayo wenno ti dadduma iti kanayon a panagbuteng. Imbes a panangitalimudoktayo iti kaadu dagiti karittayo, saan kadi a nasaysayaat nga

italimudoktayo ti maipapan ti awan inggana a kinaindaklan, kinasayaat, ken naan-anay a bileg ti Dios, nga agtaltalek Kenkuana ken agsagsagana nga addaan naragsak a puso para iti isusubli ni Jesus a Cristo?

Kas natulagan a tattaona, nasken a saantayo nga agbuteng gapu kadagiti dakes a banag a mabalin a mapasamak. Ketdi, makapagaddangtayo nga addaan pammati, tured, determinasion, ken panagtalek iti Dios iti panangsangotayo kadagiti karit ken gundaway nga agur-uray.¹⁴

Saantayo a magna iti dalan ti kinadisipulo nga agmaymaysa. “Ti Apo a Diosmo . . . makikuyog kenka; dinto agkurang kenka, wenno di met mangliway kenka.”¹⁵

“Ti Apo makibakalto gapu kadakayo, ket dakayo agtaengkayo a sitatalna.”¹⁶

Iti imatang ti buteng, makitatayo koma ti tured, papigsaentayo ti pammatitayo, ken addaan panagtalek iti kari nga “awan ti igam a naaramid a maibusor kenka ti rumang-ayto.”¹⁷

Agbibitagtayo kadi iti panawen ti peggad ken didigra? Siempre agbibitagtayo.

Kinuna ti Dios Mismo, “Ditoy lubong addanto rigatyo: ngem mananginginamakayo; siak pinarmekko ti lubong.”¹⁸

Maaramattayo kadi ti pammati tapno mamati ken agtignay a siaannurot? Matungpaltayo kadi dagiti panagkumit ken sagrado a katulagantayo? Kabaelantayo kadi a tungpalen dagiti bilin ti Dios uray kadagiti mapannubok a paspasamak? Siempre kabaellantayo!

Kabaellantayo gapu ta inkari ti Dios, “Agkaykaysanto ti amin a banag para iti pagimbaganyo, no magna-kayo a sililinteg.”¹⁹ Ngarud, iwaksitayo koma dagiti butengtayo ket agbiagtayo ketdi nga addaan iti rag-o, pakumbaba, namnama, ken natured a panagtalek nga adda kadatayo ti Apo.

Ti Naan-anay nga Ayat ti Mangpaksiat iti Butengtayo

Patpatgek a gagayyemko, ayatek a kakabsatko ken Cristo, no

matakuatantayo ti bagbagitayo nga agbibitagtayo iti buteng wenno danag, wenno no matakuatantayo a dagiti bukodtayo a balikas, galad, wenno tignay ti makaigapu iti panagbuteng dagiti dadduma, ikararagko iti amin a pigsa ti kararuak tapno mawayawayaantayo manipud iti daytoy a buteng babaen ti nadiosan a naituding a pangsuppiat iti buteng: ti natarnaw nga ayat ni Cristo, gapu ta “ti naan-anay nga ayat ti mangpaksiat iti buteng.”²⁰

Ti naan-anay nga ayat ni Cristo ket mangpamek kadagiti sulisog iti panagdangran, panagpilit, pammutbuteng, wenno panangirurumen.

Ti naan-anay nga ayat ti Cristo ket mangpalugod kadatayo a magna nga addaan pakumbaba, dignidad, ken natured a panagtalek kas pasurot ti patpatgentayo a Mangisalakan. Ti naan-anay nga ayat ni Cristo ket mangted kadatayo iti panagtalek bayat ti panagtultuloytayo nga agtignay iti baet dagiti butengtayo ket agtalektayo a naan-anay iti bileg ken kinaimbag ti Nailangitan nga Amatayo ken ti Anakna, ni Jesucristo.

Kadagiti pagtaengantayo, kadagiti lugar ti negosiotayo, kadagiti awagtayo iti Simbaan, kadagiti puspusotayo, sukatantayo koma ti buteng iti naan-anay nga ayat ni Cristo. Ti ayat ni Cristo ti mangsukatto iti buteng nga addaan pammati!

Ti ayatna ti mangted kabaellan kadatayo a mangilasin, agtalek, ken maaddaan iti pammati iti kinaimbag ti Nailangitan nga Amatayo, iti nadiosan a planona, iti ebangheliona, ken kadagiti bilinna.²¹ Ti panagayat iti Dios ken iti padatayo a tattao ket mamagbalinto ti panagtungpaltayo kadagiti bilin ti Dios a maysa a parabur imbes a maysa a dagensen. Tulongannatayto ti ayat ni Cristo nga agbalin a nasaysayaat bassit, ad-adda a managpakawan, nadungdungngo, napasasnek iti aramidna.

No punnientayo ti puspusotayo iti ayat ni Cristo, mariingtayonto nga addaan iti napabaro a naespirituan a kinasadiwa ket magnatayo a sirarag-o, sitatalek, siririing, ken sibibiagtayo

silaw ken dayag ti patpatgentayo a Mangisalakan, ni Jesucristo.

Paneknekak, kaduak ni Apostol Juan, “Awan buteng iti ayat ni Cristo.”²² Kakabsat, patpatgek a gagayyem, ammonakayo unay ti Dios. Ay-ayatennakayo unay. Ammona no ania ti agur-uray a masakbayanyo. Kayatna a “dikay agbuteng, mamati laeng”²³ ken “agtalinaed iti [naan-anay nga] ayatna.”²⁴ Daytoy ti kararag ken pammendisionko iti nagan ni Jesucristo, amen.

DAGITI NAGADAWAN

1. Da George Whitefield ken Jonathan Edwards ti dua a nalatak a pagwadan ti kastoy a kita ti mangaskasaba.
2. Doktrina ken Katulagan 121:37.
3. Taga-Galacia 5:22–23.
4. Iti maysa a gundaway, tinarigagayan ti Mangisalakan ti sumrek iti maysa a purok dagiti taga Samaria, ngem saan nga inawat dagiti tao ni Jesus ken saanda a pinastrek Isuna iti purokda. Dua kadagiti disipulona ti napasakitan unay iti daytoy ken nagsaludsod, “Apo, kayatmo kadi a mangbilinkami iti apuy a bumaba manipud iti langit ket manguram kadakuada?” Insungbat ni Jesus nga addaan pammallaag: “Saanyo nga ammo no ania a kitakayo ti espiritu. Gapu sa saan nga immay ti Anak ti Tao a mangdadael iti biag dagiti tao no di ket mangisalakan kadakuada” (kitaen iti Lucas 9:51–56, New King James Version [1982]).


5. Kitaen iti Moises 1:39; kitaen met iti Taga Efeso 3:19.
6. Exodo 34:6.
7. Kitaen iti Taga Efeso 3:19.
8. Kitaen iti Doktrina ken Katulagan 121:41 Awan duadua a no naamnamaen ti Dios kadatayo, a mortal nga annakna, nga agtignay iti kastoy, iti tunggal maysa, Isu—naan-anay a parsua nga addaan iti amin a saguday—agbalin a modelo para iti kasta a kababalin.
9. Ti Konseho iti Langit sakbay daytoy a biag ket napintas a pagarigan a mangiladawan iti kinatao ti Dios. Idiay nga indatag ti Nailangitan nga Ama ti planona para iti agnanayon a panagdur-astayo. Mairaman kadagiti napapateg a paset dayta a plano ti kinawayaya a panagpili, panagtulnog, ken pannakaisalakan babaen ti Pannubbot ni Cristo. Nupay kasta, insingasing ni Lucifer ti sabali a pamay-an. Impatalgedna nga agtungpalto ti amin—awanto ti mapukaw. Ti laeng wagas tapno maipatungpal daytoy ket babaen ti panagrangas ken pammilit. Ngem saan nga ipalubos ti managayat a Nailangitan nga Ama, ti kasta a plano. Impategna ti kinawayaya a panagpili dagiti annakna. Ammona a nasken nga agaramiddaytoy no nasken a pudno nga agsursurotayo. Ket dayta ti gapu no apay a nangipaay Isuna iti Mangisalakan, a ti agnanayon a sakripisiona ket makadalu kadatayo iti basol ken mangpalugod iti iserrekdaytoy nga agsubli iti pagarian ti Dios. Idi makita ti Amatayo iti Langit nga adu dagiti ay-ayatenna nga annak ti inyaw-awan ni Lucifer, pinilitna kadi ida a sumurot iti planona? Binutbutengna kadi dagiti nagaramid iti kasta a nakaam-amak a pili? Saan.

- Awan duadua a pinagsardeng ti nabileg a Dios daytoy a yaalsa. Mabalin koma nga impapilitna ti pagayatanna kadagiti kimmallilis ken pinasurotna ida. Ngem ketdi, pinalugodanna dagiti annakna a pumili para iti bagbagida.
10. 2 Timoteo 1:7.
11. Kitaen kas pagarigan iti, Josue 1:9; Isaia 41:13; Lucas 12:32; Juan 16:33; 1 Pedro 3:14; Doktrina ken Katulagan 6:36; 50:41; 61:36; 78:18.
12. Lucas 12:32
13. Doktrina ken Katulagan 68:11.
14. Mause pay laeng ti balakad ni Moises kadagiti tao ti panawenna: “Saankayo nga agbuteng. . . Kitaen ti panangiisalakan ti Apo, nga ipatungpalnanto para kadakayo iti agdama” (Exodo 14:13, New King James Version).
15. Deuteronomio 31:6.
16. Exodo 14:14, New King James Version.
17. Isaia 54:17
18. Juan 16:33.
19. Doktrina ken Katulagan 90:24; kitaen met iti 2 Taga Corinto 2:14; Doktrina ken Katulagan 105:14.
20. 1 Juan 4:18.
21. Laglagipentayo koma a saan nga immay ti Mangisalakan “iti lubong; a mangukom iti lubong; no di ket tapno ti lubong maisalakan gapu kenkuana” (Juan 3:17). Kinapudnona, “saan nga agaramid iti ania man malaksid ti pagimbagan ti lubong; ta patpatgenna ti lubong, uray pay no ipustana ti biagna no mayasidegna la ketdi amin dagiti tao kenkuana” (2 Nephi 26:24).
22. 1 Juan 4:18; kitaen met iti 1 Juan 4:16.
23. Marcos 5:36
24. Juan 15:10

Dagiti Pannursuro para iti Panawentayo

Manipud iti Mayo 2017 agingga iti Oktubre 2017, dagiti adalen iti Melchizedek Priesthood ken Relief Society kadagiti maikapad a Domingo ket nasken a maisagana manipud iti maysa wenno ad-adu pay a bitla a naited iti sapsap a komperensia ti Abril 2017. Iti Oktubre 2017, mabalin a mapili dagiti bitla manipud iti sapsap a komperensia ti Abril wenno Oktubre. Pilien dagiti stake wenno district president no ania dagiti mensahe nga usarento kadagiti lugarda, wenno mabalinda nga idutok daytoy a pagrebbengan kadagiti bishop ken branch president.

Sidadaan a magun-od dagitoy a bitla iti adu a lengguahe iti conference.lds.org.



Ni Presidente Thomas S. Monson

Ti Bileg ti Libro ni Mormon

Allukoyek ti tunggal maysa kadayo a nainkararagan nga adalen ken utobentayo ti Libro ni Mormon iti inaldaw.

Patpatgek a kakabsat, sibabara a kablaawankayo itri panagkikitatayo manen iti maysa a naindaklan a komperensia ti Ti Simbaan ni Jesucristo dagiti Santo iti Ud-udina nga Aldaw. Sakbay nga irugik ti pormal a mensahek ita, kayatko nga ipakaammo ti lima a baro a templo a mabangonto kadagiti sumaganad a lokasion: Brasília, Brazil; greater Manila, Philippines, area; Nairobi, Kenya; Pocatello, Idaho, USA; and Saratoga Springs, Utah, USA.

Daytoy a bigat agsaritaak maipapan ti bileg tri Libro ni Mormon ken ti napateg a panagkasapulantayo kas miembro ti Simbaan tapno adaeln, utoben, ken yaplikartayo dagiti pannursurona iti panagbiagtayo. Saan a mailabes ti panangilawlawag iti

kinapateg ti kaadda iti natibker ken awan duadua a pammaneknek maipapan ti Libro ni Mormon.

Agbibigtayo iti panawen ti nakaro a riribuk ken kinadakes. Anianto ti mangsaluad kadayo manipud iti basol ken dakes nga agsaknap unay iti lubong iti agdama? Pagtalinaedek dayta natibker a pammaneknek maipapan ti Mangisalahan, ni Jesucristo, ken ti ebangheliona ti makatulongto a mangtarabay kaniak iti kinatalged. No dikayo agbasbasa iti Libro ni Mormon iti inaldaw, basaenyo daytoy. No nainkararagan a basaenyo daytoy ken addaan iti napudno a tarigagay a mangammo iti kinapudno, ipakaammonto ti Espiritu Santo ti kinapudno daytoy kadakayo. No pudno daytoy—sipapasnek a paneknekak a

daytoy ket—ni Joseph Smith ket maysa a propeta a nakakita iti Dios nga Ama ken ti Anakna, ni Jesucristo.

Gapu ta pudno ti Libro ni Mormon, Ti Simbaan ni Jesucristo dagiti Santo iti Ud-udina nga Aldaw ti Simbaan ti Apo iti daga, ken naisublin ti nasantuan a priesthood ti Dios para iti pagimbagan ken bendision dagiti annakna.

No awanankayo iti natibker a pammaneknek kadagitoy a banag, aramidenyo dayta a kasapulan tapno magun-odyo ti maysa. Kasapulanyo ti maaddaan iti bukod a pammaneknek kadagitoy naririgat a panawen, gapu ta dagiti pammaneknek dagiti sabali ket agpatingga laeng a tarabayenkayo. Nupay kasta, apaman a nagunod, kasapulan ti pammaneknek a mapagtalinaed a napateg ken nabig babaen ti agtultuloy a panagtungpal kadagiti bilin ti Dios ken babaen ti inaldaw a panagkararag ken panagadal iti nasantuan a kasuratan.

Patpatgek a kakadua iti aramid ti Apo, allukoyek ti tunggal maysa kadayo tapno nainkararagan nga adalen ken utobentayo ti Libro ni Mormon iti inaldaw. No aramidentayo daytoy, mangngegantayonto ti timek ti Espiritu, a mangliklik iti pannulisog, mangpampek iti duadua ken buteng, ken umawat iti tulong ti langit iti panagbiagtayo. Paneknekak daytoy iti amin a pusok iti nagan ni Jesucristo, amen.

